

# TEZĂUR LITURGIC

**4 IULIE**

# ACATISTUL SF. MUCENIȚE ANASTASIA NICOLAEVNA DE LA MOSCOVA



**MOSCOVA, 2000**



# Акафист царевне Анастасии

## Кондак 1

Избранная веселити сердца человеков, грозд  
юнейший рождия седмеричнаго лозы  
Христовой, источи умиление дряхлым нашим  
сердцам, да поем ти:

Радуйся, мудрая дево царевно Анастасие,  
веселие вечное над главами нашими.

## Икос 1

Ангеле Анастасия, анафора благодарения  
нашего, анафемы русския избытие: явися на  
камени сядяща жестосердия моего: несть нам  
дороги унывати: глаголи ми, да и аз воспою  
тебе:

Радуйся, радости воскресная;

радуйся, радости крестная.

Радуйся, радости заветная;

радуйся, радости седмицветная.

Радуйся, мудрая дево царевно Анастасие,  
веселие вечное над главами нашими.

## Кондак 2

Видяще святая злое уныние наше, не по Бозе  
печаль, иже избыточествует падения, едину от  
сандалий своих оставляет нам еще в житии  
сущи: словесы удобопонятным беседуя с нами:

аще восхощете, возможете быти цари и боги по благодати, следуя стопами царственных мучеников, воспевая Премудрому Архитектону спасения нашего: Аллилуиа.

## **Икос 2**

Разум недоразумеваемый разумети ищем в житии меньше царевны: обаче не бойся, но токмо веруй: глаголет Истинный Иаиру: вси убо лжеанастасии правду воскресения глаголют: сподобльшаяся век он улучшить и воскресение, умрети бо ктому не могут: равни бо суть ангелом и сынове суть Божии, воскресения сынове суще: мы же поем царевне бессмертия:

Радуйся, радости родителей;

радуйся, радости твоих служителей.

Радуйся, радости ангелов;

радуйся, радости Царя веков.

Радуйся, мудрая дево царевно Анастасие,  
веселие вечное над главами нашими.

## **Кондак 3**

Сила Вышняго во юности твоем совершашеся, сосуде немощнейший, царевно Анастасие: егда слышим глас твой в письмах сестрам и отцу, яко тайное благоухание семьи твоей слышим: сокровенное царственных мучеников отверзаеши нам, веселием

ангельским упоевая нас, восклицающих:  
Аллилуиа.

### **Икос 3**

Имуще расслабление некое тайное,  
расслабленности не терпела отнюд, о царевно:  
темже мою душу во гресех люте расслабленную  
осени твоим предстательством, да пою о тебе:  
Радуйся, радости безрадостных;  
радуйся, радости рыдающих.  
Радуйся, радости обуреваемых;  
радуйся, радости искушаемых.  
Радуйся, мудрая дево царевно Анастасие,  
веселие вечное над главами нашими.

### **Кондак 4**

Бурю внутрь имели суть помышлений  
сумнительных даже сродницы твои, четвертой  
дщери рождейся ти, не бывшу еще наследнику  
державы отца твоего: ты же, седмая суци в  
семье твоей, яко оконце некое еси в Царство  
осьмаго дне, иже по субботе есть, отонудаже  
слышим: Аллилуиа.

### **Икос 4**

Слыша мати твою, оставляющую дети своя во  
граде Тобольске, глаголющую Ольгу в матери  
место цесаревичу, Татиану же в марфино  
служение поставляя, тебе же царевно, веселити

всех указывает, понеже дар Божий прия ты,  
Анастасие, подобный велию свету: просвещаеши  
главное в нихже взираеши, ихже любиши, ихже  
сокровенная своя совне зрети уставляеши,  
посупления и дряхлости избавляя сих, поющих:  
Радуйся, радости всеми оставленных;  
радуйся, радости чад безматерних.  
Радуйся, радости непорочная отроков безотчих;  
радуйся, радости целая отроковиц невестных.  
Радуйся, мудрая дево царевно Анастасие,  
веселие вечное над главами нашими.

### **Кондак 5**

Боготечную звезду в седмичном созвездии,  
иже яко едина зело велия звезда возшло есть над  
отечеством нашим, зрим отроковицу Анастасию:  
идеже преподобноцветен есть отец твой  
державный, и темнаго пурпура суть ризы  
матери твоя, цесаревич же, яко Димитрий  
Углический и Гавриил Белостоцкий, в  
мученичество оболчен есть, тамже и голубицею  
Ольга, и в небесных цветах раба Господня  
Татиана, Мария же златоцветно просвещает ны:  
ты же, царевно Анастасие, яко пламень  
огненный: цветом радости, иже на Небесех,  
истее причащаеши нас, зовущих: Аллилуиа.

## **Икос 5**

Видеша людие еврейстии на всяко лето воду возмущаему на овчей купели: обаче не видели суть ангела Господня. Видим тя на иконах, царевно: слышим глас твой в письмах:

тяжелоносные воды жизни нашея милостивным схождением твоим освящаются скочущии быти в Океан Вечныя Жизни, играньми, яко песньми, вопиющи тебе:

Радуйся, радости, еяже возжада Господь у кладезя Иаковля;

радуйся, радости, брашно сладкое Господу.

Радуйся, обрадуй нас малым чим обрадовати тебе;

радуйся, радости всех поющих тебе;

Радуйся, мудрая дево царевно Анастасие, веселие вечное над главами нашими.

## **Кондак 6**

Проповедницы Богоноснии быша вси отражавшии свет твой: Ольга, сестра царева, Татиана, дщи безмездника Евгения, Петр, детоводитель твой: зане слава святых изменяет взирающих нань. О царевно Анастасие! Даждь нам радость сию, да поем: Аллилуиа.

## **Икос 6**

Воссиявый в сонмище просвещение истины, слышит от безумна учителя: шесть дней

приходите целитися, но не в субботу. Ныне глаголют неции, яко не достоит молитися вам коемуждо по единому, но токмо купно всем царственным мучеником. Ты еси седмая в семье твоей, царевно: мы же числ не вемы, исцелеваемы токмо сенью твоею, уповаемы житием твоим, яко новым вином Царствия, поюще тебе:

Радуйся, радости, упраздняющая премудрость;  
радуйся, радости, затворяющая книжность.

Радуйся, радости безпредельная;  
радуйся, радости жизни во Христе.

Радуйся, мудрая дево царевно Анастасие,  
веселие вечное над главами нашими.

### **Кондак 7**

Хотящу прославлению святых царственных мучеников совершится от Бога, а не от человек, да убоятся лукавнующии свидетельства, иже о царевне Анастасии: всяк, близ нея сущий, буди готов вопрошен быти о ихже не ждал есть. Аще ли не престанут от лукавствия за еже возмощи пети о царевне: Аллилуиа.

### **Икос 7**

Новую Анастасию Узорешительницу показывает тя Господь во узилище мрачном, доме Поппель: яко наятые работати в клятвенном месте сем

свидетельствуют царственных мучеников  
веселящихся между отпеванием их и смертью за  
Христа: аще ли не ты, луча воскресоименная,  
врата адовы растерзаеши радостию, иже от  
Господа, и есть дивна во очесех наших, темже  
ныне поем:

Радуйся, радости, темный огонь орошающая;  
радуйся, радости, вечный мраз увесняющая.  
Радуйся, радости, субботне впадшия в студенец  
стражницы извлекающая;  
радуйся, радости, невинно страждущих Пасце  
причащающая.  
Радуйся, мудрая дево царевно Анастасие,  
веселие вечное над главами нашими.

### **Кондак 8**

Странное в житии твоём видевшее, иже в Спале  
Беловежской: брату твоему умирающему, ты  
галльское некое смехотворство представляеши  
гостям дому отца твоего. Что убо веселие сие?  
Несть убо разрушение целомудрия, обаче  
воздвижение средостения между миром и  
семьей: болезнь бо единароднаго цесаревича  
веля тайна бысть. Что убо послушание сие: аще  
ли не воскресная тайна, иже вящше есть  
разрушения телеси, да и в смерти пасхальне  
зовем: Аллилуиа.

## **Икос 8**

Весь бе в нижних, пришедый не праведный, но грешный спасти, и вышних никакоже отступи  
Неописанное Слово: едину от птиц небесных,  
юнотку царственную зря в древесных ветвях  
возлюбльшую укрыватися, глаголет и сей:  
царевно, потщався. слези: днесь бо в Дому Моем  
подобает тебе быти. Сия же, оставльши  
мучилищное древо свое, не остави  
крестоношения, иже по нам, в раи присно моля  
Владыку о России, понуждая нас пети сице:  
Радуйся, радости Златопомазаннаго;  
радуйся, радости Воскресшаго.  
Радуйся, радости смерть поправшаго;  
радуйся, радости тебе нам даровавшаго.  
Радуйся, мудрая дево царевно Анастасие,  
веселие вечное над главами нашими.

## **Кондак 9**

Всякое естество ангельское ныне с нами  
невидимо служит святой мученице ради Христа  
царевне Анастасии, страсотерпцу  
Черниговскому Игорю сослужащу: аще ли не яко  
князь-схимник, ты, о чадо, искупаеши грехи  
сродник твоих, от них же обрящет ли кто  
единаго, иже не подкопывал крестное древо  
последняго царствования делом, словом,  
помышлением: с мучеником древлим, иже в  
Киеве, поем царевне: Аллилуиа.

## **Икос 9**

Ветия многовещанные аще непщuemся быти, обаче вемы, яко не суть речи, ниже словеса довольны изрещи неизреченныя тайны твоя, царевно: вся глаголемая яко медь звенящи, и яко кимвал звяцай вменити можеш, обаче веруем, помози неверию нашему: яко не о себе, но от избытка сердца глаголем тебе:

Радуйся, радости, сокровенный сердца человек; радуйся, радости наедине предстояния Христу.

Радуйся, радости молчания нашего;

радуйся, радости безсловесия во Христе.

Радуйся, мудрая дево царевно Анастасие, веселие вечное над главами нашими.

## **Кондак 10**

Спасти хотя мир тобою, царевно, поглумитися миру изводит Господь тебе, о чадо, на позорище: вся убо красная мира яко уметы зрим о тебе, даже власов лишенной, ты же друзей своих воина-простеца и крестьянское чадо твориши.

Оваго убо чести глаголы Жизни Вечная научая, не ведуца грамоты прежде, оваго же вознося на руцех твоих от персти к Небесным, якоже зрим на фотографии твоей: сияеши лепотою неизглаголанною всем поющим о тебе: Аллилуиа.

## **Икос 10**

Стена еси из капель дождевных, о Анастасие, на них же взирая, Свет Истины, Христос Бог, радостию тайною исполняет царственных мучеников глаголати во мрачных удолиях заточения: Обаче никто как Бог. Об узорешительном даре твоём рцем сице:  
Радуйся, радости в пустыни безводней;  
радуйся, радости гедеонова.  
Радуйся, радости нееманова седмеричная;  
радуйся, радости, в нюже внидем покаянием.  
Радуйся, мудрая дево царевно Анастасие, веселие вечное над главами нашими.

## **Кондак 11**

Пение всякое побеждается наше, егда взираем на дом Поппель, гроб нов, идеже никтоже положен бысть пятидесятью летом: клятвенныя хулы хохотом сатанинским противооглашают отгуду страну российскую. Ты же, о царевно, слух наш от уз сих разрешая евангельски стихословиши не седмь, но седмижды семь раз прощати врагом своим, слышиши от всех:  
Аллилуиа.

## **Икос 11**

Светоприемники свечи становимся, недостойнии, свет восприимши стреляний, уязвлений, ссечений, иже о вас мученики

царственнии: идеже дважды вопрошает царь:  
Что? Что? стреляющих не яко не ведый сих всех,  
но во еже последнее промедление угобзити  
иродом пред бездной лютой до конца моляся о  
них, мы же плачем отроковице:

Радуйся, радости, о нейже не глагола Христос,  
яко не умрет;

радуйся, радости, не могущая умерети.

Радуйся, радости Всехитреца Господа;

радуйся, радости Богови, в смерти глумящаяся  
кесарю.

Радуйся, мудрая дево царевно Анастасие,  
веселие вечное над главами нашими.

### **Кондак 12**

Благодать дати восхотев даже разбойником, аще  
имут останки благаго разума, гортани лютую  
язву вымаливает царица емуже стрелял есть во  
уста ея: да zde наказан быв, менее страждет за  
гробом: такожде разбойников, ищущих ругатися  
мощем царственных мучеников, ослепляет Сый  
Господь сребролюбием, бисером многоценным  
обретшимся во одеждах детей. Мы же, бояся  
взирати на оных бисеров царственных, ихже не  
бе мир весь достоин, покрываемся пением:  
Аллилуиа.

## **Икос 12**

Поюще тя, царевно Анастасие, хромлющим на обе ноги, расслабленны во гресех, слячены многими узами железными преступлений наших есмы: обаче тобою, яко Давид, скачуции и играючи становимся, глашая сие:

Радуйся, радости, Мелхолы прощение;

радуйся, радости, воскресением словущая.

Радуйся, радости, чадствуяй нам Воду Живу;

радуйся, радости, манно веселия в пустыни житейской.

Радуйся, мудрая дево царевно Анастасие, веселие вечное над главами нашими.

## **Кондак 13**

О седмая от мучеников царственных царевно Анастасие, благословенная Суббото

Воскресоименная! Воспомяя чудеса Христовы субботне творимыя, паче же слово Божие, иже не человек ради субботы, но суббота ради человека, дерзаем пети тебе и просити тебе одождити нам умиление сердечное и покаяние всецелое, да внидем в радость твою, поюще Богу: Аллилуиа.

Сей кондак глаголи трижды, и паки первый Икос и первый Кондак.